

《佛說無量壽經》 補充講表

◎附表九：

○住深定門，悉觀現在無量諸佛。一念之頃，無不周徧。濟諸劇難，諸閑不閑。

《妙法蓮華經》觀世音菩薩普門品云：

弘誓深如海，歷劫不思議。侍多千億佛，發大清淨願。

○超過世間諸所有法，心常諦住度世之道。

唐譯《大寶積經》卷十七無量壽如來會云：「超過世間一切之法，善知一切出世間法。」

《佛說無量壽經甄解》云：「世間諸所有法者，有為、可毀壞名世間，依正、善惡、因果等一切有為諸法言：諸所有法也。菩薩能知一切三界虛妄，而行世間不捨，故云：超過。」

《佛遺教經解》云：「世間亦二：一者，三界依報，是器世間；二者，六道正報，是眾生

世間。」

《佛說無量壽經甄解》云：「度世之道猶言出世道，故出世無為法，名度世之道，出有為

證無為，而不著無為，故云：諦住。」

○濟諸劇難，諸閑不閑，

《妙法蓮華經》觀世音菩薩普門品云：

眾生被困厄 無量苦逼身 觀音妙智力 能救世間苦

具足神通力 廣修智方便 十方諸國土 無刹不現身

種種諸惡趣 地獄鬼畜生 生老病死苦 以漸悉令滅

○為諸庶類，作不請之友。荷負羣生，為之重擔。

《普賢行願品》云：「於諸病苦，為作良醫；於失道者，示其正路；於闇夜中，為作光明；

於貧窮者，令得伏藏。菩薩如是平等饒益一切眾生。」

○受持如來甚深法藏，護佛種性，常使不絕。

※悲救眾生，佛種不斷，是菩薩之要也，諸佛之本意也。

《普賢行願品》云：「菩薩若能隨順眾生，則為隨順供養諸佛；若於眾生尊重承事，則為

尊重承事如來；若令眾生生歡喜者，則令一切如來歡喜。」

○興大悲，愍眾生。演慈辯，授法眼。杜三趣，開善門。…如純孝之子，愛敬父母。

《普賢行願品》云：「謂盡法界、虛空界，十方剎海所有眾生，種種差別。所謂卵生、胎生、濕生、化生；或有依於地、水、火、風而生住者，或有依空及諸卉木而生住者；種種生類，種種色身，種種形狀，種種相貌，種種壽量，種種族類，種種名號，種種心性，種種知見，種種欲樂，種種意行，種種威儀，種種衣服，種種飲食，處於種種村營、聚落、城邑、宮殿；乃至一切天龍八部、人、非人等，無足、二足、四足、多足，有色、無色，有想、無想，非有想非無想。如是等類，我皆於彼隨順而轉。種種承事，種種供養，如敬父母，如奉師長，及阿羅漢，乃至如來，等無有異。」